

四庫全書

史部

欽定四庫全書

史部

皇朝通典卷四十三

編修臣李傳熊覆勘

總校官編修臣程嘉謨

欽定四庫全書

皇朝通典卷四十三

禮吉三

北郊

臣等謹按方丘祭地見於周官杜典因之是也其附神州后土則以神州為北郊誤分祭地為二且神州之說出自鄭注讖緯之說未可為據至於漢代渭陽汾陰后土祠祀更為不經唐宋相沿至明

始輟

國朝定制夏日至大祭

地於

方澤是為

北郊法古垂後準禮經而超百代矣欽維

列祖親祀

方丘鉅典煌煌允與

圜壇並重

皇上臨御以來歲必

躬親展祀每以夏至正當盼雨之時

寅衷默禱旋即甘霽渥霑仰見昭格之

忱五十年來精誠如一謹稽

北郊祀典並

列祖升配大禮恭著於篇而原書附見之神州后土則謹

從刪去云

順治元年定每歲夏日至大祭

地於

方澤以

五嶽

五鎮

四海

四瀆為四從壇配享

方澤在安定門外北郊形方象地方折四十九丈四尺四寸深八尺六寸寬六尺澤中貯水方澤北向二成

上成方六丈下成方十丈六尺均高六尺內壝方
二十七丈二尺正北三門東西南各一門外壝方
四十二丈門與內壝同南門後

皇祇室五間北向圍垣正方周四十四丈八尺北向一門

內外圍垣二重內垣周五百四十九丈四尺北三

門東西南各一外垣周七百六十五丈西向門三

角門一又西有坊一曰泰折街

雍正二年改
名廣厚街

八年

尊封

肇祖原皇帝

興祖直皇帝陵山為啟運山

景祖翼皇帝

顯祖宣皇帝陵山為積慶山

十六年奉移
附啟運山停積慶山從祀

太祖高皇帝陵山為天柱山

太宗文皇帝陵山為隆業山附

四從壇配享十四年三月壬子大祀

地於

方澤奉

太祖高皇帝

太宗文皇帝配享

世祖章皇帝親詣行禮

康熙元年五月戊寅夏至大祀

地於

方澤

聖祖仁皇帝親詣行禮二年尊封

世祖章皇帝陵山為昌瑞山從祀

三陵山之次六年十一月丙辰大祀

地於

方澤奉

世祖章皇帝配享

雍正二年五月癸卯夏至

世宗憲皇帝大祀

地於

方澤奉

聖祖仁皇帝配享

乾隆元年五月丙午夏至大祀

地於

方澤

皇上親詣行禮是月尊封

世宗憲皇帝陵山為永寧山從祀

四陵山之次二年五月辛亥夏至大祀

地於

方澤奉

世宗憲皇帝配享

皇上親詣行禮恭奉

世宗憲皇帝神位行參拜

皇地祇禮禮畢安奉

配位如儀八年五月癸未夏至大祀

方澤先期致齋於

齋宮定制

兩郊皆有

齋宮是歲修葺

北郊齋宮齋宿如禮九年五月戊子夏至大祀

方澤先奉

諭旨去歲親葺齋宮先期一日住宿但彼處樹木新植
尚未成陰天氣炎熱扈從人多不免有病暍者今歲
炎熱甚於舊歲此次不必前詣壇內齋宿仍在宮內

齋宮住宿將來遇親祭之年該衙門兩請候旨俟樹木成陰仍照例齋宿壇內此次前往致祭正當祈雨之時不乘輦不設鹵簿傳諭各衙門知之十一年四

月

諭今歲夏至致祭

地壇齋宮樹木漸次成陰扈從人等已有憩息之所況逢時雨之後天氣清涼朕仍照原議前往

壇內齋宮住宿十四年五月

諭稽古明禋肇祀

郊壇各以其色

地壇方色尚黃今

皇祇室乃用綠瓦蓋沿前明舊制未及致詳朕思

南郊大饗殿在勝國時合祀

天

地山川故其上覆以青陽玉葉次黃次綠具有深意且

南郊用青而

地壇用綠於義無取其議更之至

兩郊壇宇雖歲加塗墍而經閱久遠應敕所司省視所當修整者敬謹從事大學士會同各該衙門詳考典章具議以聞尋大學士等奏言謹考禮經所載

兩郊義類甚著故祭分二至以順陰陽之時壇釐南北以從陰陽之位制別方圓以則陰陽之象惟辨色亦然春官以玉作六器以禮天地四方蒼璧禮天黃琮禮地牲帛各從其器之色所謂依類求神者也

制禮從類辨色從方原屬不易之道又况棟宇檐
桷乃以藏

神祇而昭妥侑其義尤謹明代南北兩郊分祀而

皇祇室編次綠瓦臣等詳檢一切禮書並無考據查綠乃
青黃間色誠如

聖諭於義無取坤卦天元地黃考工記天謂之元地謂
之黃二者係乾坤正色今

北郊壇甃遺瓦及牲帛幃幄色俱用黃乾隆十三年遵

旨議定遵豆成式

地壇祭器亦用黃質製造契合古制寧

神與歆

神不當有異應請易蓋琉璃黃瓦庶與坤卦黃中之義相

符若夫

兩郊壇宇歲修向有著令而經閱久遠金碧采章或日久

不鮮階級甃甃間有損缺堊赤間有漫漶均宜遵

旨修整及時興工奏上從之十五年五月夏至大祀

方澤以祈雨不乘輦不設鹵簿與九年同自後凡值祈雨
皆如此例是年奏准

方澤二成臺面琉璃惟中含六六陰數其餘皆係湊合於
義無取請照

圜丘壇制鋪石就壇面鑿眼以備安設幄次其石數一成
正中仍照舊制用三十有六八方均以八八積成
縱橫各二十四路二成倍上成八方八八之數半
徑各八路庶與偶數相應而輓式勻稱益堪永久

十六年修理

北郊

皇祇室擇吉興工前期遣官告祭

天

地

太廟後殿

奉先殿

社稷屆期詣

皇祇室以奉請

神位祇告

皇地祇

列聖

從壇神位禮部尚書率太常寺官恭奉各

神牌至暫奉

神位所敬謹安設十七年

北郊工竣擇吉恭請

神位還御

皇祇室遣官詣暫奉

神位所祇告

皇地祇

列聖

從壇神位禮部尚書率太常寺官恭奉各

神牌還御奉安畢行一跪三叩禮其祇告

天

地

宗

社俟

南郊工竣日舉行三十二年禮部奏夏至恭祭

地壇齋宿齋宮恭候

欽定奉

諭宮內齋宮齋宿嗣後不必請旨三十六年太常寺奏
皇上親詣行禮向由北門入禮畢由西門還宮今仰請

皇上由西門入禮畢仍由西門還宮從之三十七年十

一月大學士等遵

旨議准郊

天儀注並酌定

方澤壇行禮儀節

皇上初陞至二成拜位立贊引官奏陞壇

皇上陞階上香還至二成拜位行迎

神禮典儀官唱奠玉帛

皇上陞階行奠玉帛禮還就讀祝位立以次進俎三獻
及飲福受胙禮成仍還至二成拜位行謝

福胙及送

神禮

臣等謹按是年大學士等遵

旨議定

壇

廟大祀

親詣行禮升降儀節酌減合宜所奉

聖諭已於

南郊篇中恭載又三十九年有

年逾六旬始如此酌量節減之

諭並詳著

南郊篇云

四十三年八月

皇上恭謁

祖陵至

盛京

命修葺

盛京

地壇四十五年五月定

北郊大祀

親詣

正位晉獻香帛俎爵至

配位

列祖

列宗前惟

躬詣上香獻帛其獻爵進俎則

命諸皇子恭代一如

南郊之禮

臣等謹按乾隆四十四年

南郊大祀

上以年屆七旬因稍省繁勞專心禡薦定為

親承恭代之禮所奉

聖諭已恭載於

南郊篇中至四十五年

北郊大典一如此禮舉行云

四十八年五月

諭朕臨御以來祇畏寅恭凡遇

壇

廟大祀無不恪誠齋被親詣行禮茲屆夏至

北郊於十九日進宮齋戒適因氣滯舊病作痛現在令醫
加意調攝尚未全痊誠恐升降儀節有愆轉不足以
昭誠敬此次朕即在御園齋戒派皇六子永瑤敬謹
恭代行禮若臨期氣體全安朕仍親往肅恭蒞祀凡

北郊儀節具

大清通禮

社稷

臣等謹按古者建國之制社稷為先祈福報功祀典最重我

朝定制

社稷壇為大祀凡

列聖以來

親祭

社稷壇者

國史所書不可勝紀茲惟恭載最初一次以見

德馨誠格有終始如一者焉我

皇上臨御五十年來凡春祀

社稷皆

躬詣行禮惟遇

巡省之歲遣官恭代至每年

巡幸塞外舉行大獮之典秋祀

社稷皆遣官恭代又二十四年

皇上以

親祭

社稷壇儀注無薦王之禮

諭以玉庇嘉穀於答陰之義為稱

敕所司用玉將事載入會典禮儀益為隆備茲悉恭紀
於篇

順治元年定祭

社稷壇之禮每歲春秋仲月上戊祭

太社

太稷之神同壇同壝

太社以

后土勾龍氏配

太稷以

后稷氏配

社主用石半埋土中

今全埋

稷主用木仍設

太社

太稷

后土勾龍氏

后稷氏神牌祭於

壇上壇在

午門之右八年二月戊戌祭

太社

太稷

世祖章皇帝親詣行禮飲福受胙如

園丘例八月上戊值

太宗文皇帝忌辰行禮畢仍易素服

康熙元年二月戊申祭

社稷壇

聖祖仁皇帝親詣行禮三年八月上戊恭遇

太宗文皇帝忌辰改期中戊致祭

社稷壇十六年二月戊申

親祭

社稷壇定制祭日遇雨

皇帝於拜殿內門檻南行禮陪祀王公在殿外中甬路
兩旁各官在王公後行禮是日雨太常寺以舊例
請

命仍照常處行禮二十一年二月戊子

親祭

社稷壇前期齋戒恭值

太皇太后聖節於行禮之後補行慶賀

雍正元年二月戊午祭

社稷壇

世宗憲皇帝親詣行禮二年閏四月以平定青海告祭
社稷行獻俘禮六年議定

太社

太稷神牌均高二尺五寸神座尺有五寸共高四尺邊
豆案僅高尺有二寸較各壇稍低應將神座加高
一尺安奉

神牌共高五尺以符土為五數之古制其籩豆等案應加高尺有三寸共二尺五寸以符五五之數

配位神牌各高二尺四寸神座高尺有四寸籩豆案高尺有二寸應將神座及籩豆案均增高一尺以符體制十年三月

詔直省郡縣修

社稷壇敬謹行禮先是定制直省均設壇壝以祀社稷至是奉

諭旨直隸各府州縣設立壇墀致祭

社稷及

風雲雷雨山川城隍之神每歲春秋展祀以崇報享典至重也從前初建之時有司或視為具文規制未必周備又未必及時修葺是以僻遠之郡縣規模簡畧禮儀草率者往往有之甚非肅將禋祀之本意也著禮部行文各省督撫飭府州縣敬謹修理以重祀典

乾隆元年二月戊辰祭

社稷壇

皇上親詣行禮二年閏九月奉

諭旨大清律載各府州縣

社稷山川風雲雷雨諸神所在有司以時致祭所以肅
祀典而迓休和禮至重也省會之地督撫司道駐劄
同城向不與祭專屬府州縣官行禮督撫司道均有
封疆守土之任自當虔奉明禋為民祈報凡春秋致
祭督撫應率領闔屬文武大小官員敬謹行禮提鎮

道員駐劄之地一體率屬陪祭其如何分別班次派員監禮及修整壇壝祭器之處該部詳議具奏奏上通飭行之八年七月

頒發各省

壇廟祝文十八年奏定增撰

社稷壇祈雨報祭樂章皆以豐為名

詳見樂典

二十年六月

以平定準噶爾獻俘

社稷壇十月再行獻俘禮俱遣親王將事二十一年五

月增

社稷壇望瘞樂章

詳見樂典

二十四年五月

諭朕此次親詣

社稷壇祈求雨澤禮部所開儀注內無薦玉之禮詢其
原委則係相沿舊規並無意義可考夫玉以庇蔭嘉
穀使無水旱之災載在傳記且於答陰之義更為相
稱著飭所司敬謹用玉將事

御製祝文曰臣聞人事失於下



天變應於上茲亢暘之示警洵贊化之無能言念昨年秋霖缺而冬雪乏逮至今歲春望霈而夏未霑歷四時之久矣嗟三農其如何常雩步禱弗蒙矜不敢再三之瀆羣祀親藩徒致籲益增宵旰之憂敬念

右壇為祈報之所載稽祭義司土穀之精蠲吉虔齋攄忱躬懇為民請命願代萬姓之災責已惟誠奚啻六事之舛重舉答陰之典冀施甘雨之滂雲作雷隨毋俾箕伯侵軼犧成粢潔尚敷帝里休和殷佇

神歆立沛祥霽謹告祭日

皇上戴雨纓冠素服自右門由右路至御輦處步行詣壇行禮二十五年正月以平定回部獻俘

社稷壇如二十年之禮三十七年大學士等遵

旨議淮郊

天儀注並酌定

社稷壇行禮儀節有司先設幄次於拜殿內

皇上乘輦由闕右門入東北門至

社稷壇外門外

御禮轎入右門循戟殿東行至拜殿東階下降輿升階詣

壇行禮禮成升輿亦如之

臣等謹按是年大學士等遵

旨議准郊

天儀注並酌定

社稷壇行禮儀節又三十九年奉

諭年逾六旬始如此酌量節減並恭載於

南郊篇內茲不重述云

四十一年二月

諭

社稷壇之有拜殿原以備致祭之日或有風雨也今年偶值雨所司移拜位香案於殿中餘仍列於

壇上是朕獨得蔽棟宇而

神位牲醪並皆露設非所以昭妥侑朕心深切不安

社稷之制不設棟宇以承天陽祇就壇壝而言至
神牌平日原係尊藏

神庫未嘗不在屋宇之內則祭享時偶因風雨移奉殿
內又有何嫌忌乎且拜殿甚寬想當締造之初未必
不預為臨時移奉計祇以未嘗經之事所司遂依例
陳設不知所據嗣後祭時或遇大風雨所有

神位祭器應如何移就拜殿之處著大學士九卿會同
太常寺敬謹詳議具奏尋大學士等遵

旨議奏如祭日請

駕前十刻值風雨太常寺將祭品樂簾移設拜殿奉安神牌於殿內致祭若驟遇風雨謹用

神龕覆設

神位另設香案於拜殿奏請

皇上於拜殿行禮從之四月以平定兩金川獻俘

社稷壇如二十五年之禮凡祭

社稷壇儀節具

大清通禮

堂子

大內祀神

臣等謹按

欽定滿洲祭神祭天典禮一書知

堂子之祭為我

聖朝敬事

天神之令典凡遇大事及每歲元旦春秋二季有祈有報

又凡大出征必告凱旋則列纛而拜皆

親詣行禮祀典尊崇敬誠懋著謹考典文與

郊

社以義相從

大內之祀即以類載儀節備詳永垂億禩焉

國朝初建

堂子在

盛京撫順門外

太祖高皇帝建國之初有謁拜

堂子之禮

天聰九年八月

太宗文皇帝以征察哈爾奏凱師還

親詣

堂子行拜

天禮崇德元年五月大軍征明

太宗文皇帝

親率王貝勒等詣

堂子行禮拜纛出師是歲定制每年元旦

皇帝率親王以下副都統以上及藩王等詣

堂子上香行三跪九拜禮十二月

親征朝鮮出師之日設鹵簿吹螺奏樂

親詣

堂子行禮於

堂子外建立八纛吹螺奏樂拜纛啟行次年班師詣

堂子行禮七年三月以錦州捷聞

親率王貝勒等詣

堂子行禮

順治元年四月

世祖章皇帝命王貝勒帥師平定中原

親詣

堂子奏樂行禮拜纛出師九月既定燕京即建

堂子於長安左門外玉河橋東街門北向內門西向正中

為祭

神殿南向前為拜

天園殿殿南正中設

大內致祭立杆石座次稍後兩翼分設

皇子致祭立杆石座次親王郡王貝勒貝子公各以
次序列北向東南為

上神殿南向

康熙十三年正月以吳三桂叛逆遣大將軍王等

帥師出征

聖祖仁皇帝親詣

堂子行禮祭纛以行十四年閏五月以平定察哈爾凱旋
聖祖仁皇帝率大將軍王暨諸大臣詣

堂子行禮三十五年二月

親征噶爾丹率諸王大臣詣

堂子行禮祭纛出師六月凱旋詣

堂子行禮五十七年十一月以遣大將軍王等帥師出征

策旺阿喇布坦

御太和殿設鹵簿出征大將軍王等以下俱戎服不出征者蟒服以從詣

堂子行禮乃鳴角祭纛啟行

雍正七年六月以大兵進勦準噶爾遣大將軍出師北路

世宗憲皇帝率大將軍以下及諸王大臣詣

堂子行禮祭纛出師

乾隆十三年十一月以遣大學士經畧金川

皇上率經畧大學士及王公大臣等詣

堂子行禮祭燾出師次年凱旋祇告如禮十四年五月奉

諭旨

堂子之祭乃我朝先代循用通禮所祭之神即

天神也

列祖膺圖御宇既稽古

郊禋而燔柴典重舉必以時

堂子則舊俗相承遇大事及春秋季月上旬必祭

天祈報歲首最先展禮定鼎以來恪遵罔怠且不易其名
重舊制也考諸經訓祭天有郊有類有祈穀祈年禮
本不一兵戎國之大事故命遣大將必有事於

堂子正類祭遺意而列燾行禮則禡也我

祖宗於行營中或別有征討不及歸告

堂子則望祭而列燾行事其誠敬如此朕思出師告遣則
凱旋即當告至乃

天

地

宗

社俱已祝冊致虔且受成太學而

堂子則弗之及祠官疎畧如

神貺何祀典攸闕彛章宜備著議政王大臣詳議具奏朕
親為裁定王大臣等遵

旨議上大兵凱旋

皇帝告祭

堂子之禮請載入會典從之十九年四月

諭禮部等衙門王公等建立神杆理應按照爵秩等次
設立整齊以肅觀瞻著每翼作為六排每排六分以
未分封皇子等列於前其次則親王郡王貝勒貝子
公等分為六層設立神杆皇子內已受封爵者其神
杆視所封爵立於應立之處所有石座不必移動神
杆各按爵次更換每年修整一次交禮部會同內務

府總管查看繪圖進呈著為例尋禮部等衙門議奏
謹遵

諭旨神杆立座每翼為六排每排為六分

皇子神杆列於前其次親王郡王貝勒貝子公各按
排建立但查左翼親王現有七位今一排建立六
杆應將第七位親王神杆列於次排郡王之首其
郡王貝勒貝子公俱按次接續右翼親王四位郡
王六位貝勒二位貝子一位公十七位人數多寡

不一不能每排俱得六人之數應將親王列於前
其次郡王貝勒貝子公按一排六分之數通融接
續敘立奏入從之四十三年八月

皇上恭謁

祖陵至

盛京

命修葺

盛京

堂子四十七年正月初四日祭

祈穀壇仍於初一日

親詣

堂子行禮先是定制元旦行禮值

祈穀壇齋戒將可否展期於初五日行禮之處具奏得

旨遵行是年以元旦行禮禮成還宮時尚在未入齋戒

以前仍導迎作樂用昭大典凡儀節制度詳具

大清會典及

欽定滿洲祭神祭天典禮

大內祭

神之禮肇自

盛京既恭建

堂予以祀

天又於

清寧宮正寢恭設

神位以祀

神至順治元年定為

坤寧宮祭

神之禮皆如

清寧宮例每日奉朝祭

神位於祭

神殿西位東向日昧興行禮奉夕祭

神位於西北南向申刻行禮惟齋戒忌辰並禁止屠宰等

日期不祭餘日皆祭每月朔則祭

神翼日則祭

天季春季秋月朔

或二四八十月
或上旬報吉

則立杆大祭前期一二

日

宮內報祭大祭之日恭請

神位於

堂子內祭畢復請入

宮大祭翼日則祭

天春夏秋冬四季則有獻神之祭均用馬牛金幣祇薦如

禮歲於十二月二十六日恭請

神位供於

堂子正月初二日自

堂子恭請

神位入

宮四月初八日浴佛節請

神至

堂子禮畢請

神還

宮其儀節並詳

大清會典及

欽定滿洲祭神祭天典禮

皇朝通典卷四十三

欽定四庫全書

皇朝通典卷四十四

禮吉四

山川

臣等謹按禮經所載五嶽四瀆望秩隆焉其餘山川之神亦咸崇報享

本朝定制義法悉協敬稽祀典於

嶽鎮海瀆有

時巡展祭有因事遣祭有所在專祭於

名山大川有奉

特典

崇建廟祀者並著於篇至於封祀龍神原非即海瀆之本神而昭德報功載在祀典相沿已久即鹽井之神亦與山川義近謹從類附惟黑龍潭玉泉龍神宜在京都祀典之列另立專門故不以附於此篇
順治元年定禮以

五嶽

五鎮

四海

四瀆配享

方澤壇又立

地祇壇以

五嶽

五鎮

四陵山

四海

四瀆之祇為正位以

京畿名山大川

天下名山大川之祇為從位凡

嶽鎮海瀆所在地方有司歲以春秋仲月諏日致祭祭

東嶽泰山於山東泰安州

今升為府

祭西嶽華山於陝

西華陰縣祭中嶽嵩山於河南登封縣祭南嶽衡

山於湖廣衡山縣祭北嶽恒山於直隸曲陽縣

移祭

見後祭東鎮沂山於山東青州府祭西鎮吳山於陝

西隴州祭中鎮霍山於山西霍州祭南鎮會稽山

於浙江會稽縣祭北鎮鹽巫閭山於遼東廣寧衛

今改祭東海於山東萊州府望祭西海於山西蒲

為縣

州今升祭南海於廣東廣州府望祭北海於河南

為府

濟源縣

移祭見後

祭河瀆於蒲州祭江瀆於四川成都

府祭淮瀆於河南唐縣祭濟瀆於濟源縣三年加

封

黃河龍神為顯佑通濟金龍四大王之神封

運河龍神為延庥顯應分水龍王之神令河道總督
以時致祭八年正月

世祖章皇帝親政遣官致祭

嶽鎮海瀆定制恭遇

慶賀大典頒布

恩詔則遣官致祭

嶽鎮海瀆以各衙門四品以上堂官將事諏吉將行先期陳祝文香帛於

中和殿

皇帝親閱遣之十七年三月以科臣粘本盛條奏下禮部議覆改祀

北嶽於山西渾源州

康熙六年七月

聖祖仁皇帝親政遣官致祭

嶽鎮海瀆十六年四月

命內大臣覺羅武默納侍衛費耀色等詣長白山審驗明
晰酌行祀禮九月奉

諭旨長白山發祥重地奇蹟甚多山靈宜加封號永著祀
典以昭國家茂膺神貺之意禮部奏請依嶽鎮之例封
為

長白山之神照五嶽例春秋致祭令寧古塔將軍遣官
在黑龍江地方望祭遇有

慶典即令祭北鎮官前往望祭奏上從之十八年五月
以湖南用兵屢捷咸言湖神助順

敕封為

洞庭湖之神遣官致祭二十一年二月以平定雲南
遣官致祭

嶽鎮海瀆

長白山三月

聖祖仁皇帝東巡

盛京

駐蹕吉林烏喇地方於松花江岸東南設幄次望祭

長白山之神二十二年正月遣官往祀

雞公山神令有司春秋致祭二十三年十月

聖祖東巡

躬祀

泰山之神至黃河遣官祭

河神廟十一月遣官致祭

嶽鎮海瀆

長白山嗣是

東巡及

南巡所過名山大川均照例致祭二十五年五月副都御史徐元珙疏言祀典所載致祭北海尚沿宋明舊制於河南濟源縣係在京之南於義未合況北嶽已改祀渾源州則北海應請改祀於混同江庶方位允協下部議行之二十七年十月以

孝莊文皇后升祔

太廟遣官致祭

嶽鎮海瀆

長白山三十五年封

大沽海口之神遣官致祭時由天津海道運米

盛京以備賑濟海神効靈往來迅駛立廟天津春秋

致祭三月

聖祖仁皇帝北征

駐蹕噶爾圖遣大學士致祭

山川之神及出卡倫遣祭域外

山川之神

聖駕至克魯倫河遣祭

河神均與因事遣祭

嶽瀆禮同三十六年二月

西巡至保德州及橫城均遣官致祭

河神凡所過名山大川均遣官致祭七月以平定朔

漠致祭

嶽鎮海瀆

長白山三十七年七月以霸州等處新河告竣

賜名永定河封為

永定河之神建廟於盧溝橋祀之九月

聖祖仁皇帝東巡遣大學士致祭

松花江之神三十九年六月河臣疏言江南安東縣

海口攔黃壩拆去水勢流通海神効靈請建廟崇

祀

詔改名大通口封為

大通口海神春秋致祭四十年正月加

黃河龍神昭靈効順封號四十二年三月

聖祖仁皇帝五十萬壽遣官致祭

嶽鎮海瀆

長白山是年

聖祖仁皇帝巡幸山西經過

駐蹕地方應祭

嶽瀆均遣官致祭又

西巡至潼關遣官致祭

西嶽華山四十三年二月封

淮神為長源佑順大淮之神五十二年三月

聖祖仁皇帝六十萬壽遣官致祭山川如四十二年之禮

五十七年十二月以

孝惠章皇后升祔

太廟遣官致祭

嶽鎮海瀆

長白山六十年三月以

御極六十年大慶遣官致祭山川如五十二年之禮六十

一年建

江海潮神廟於浙江之共山春秋致祭十一月

世宗憲皇帝登極遣官致祭

嶽鎮海瀆

長白山

雍正元年二月以恭上

聖祖仁皇帝尊諡遣官致祭

嶽鎮海瀆

長白山十二月以

冊立

皇后遣官致祭如禮二年八月加

四瀆封號江瀆曰涵和河瀆曰潤毓淮瀆曰通佑濟瀆

曰永惠均遣官齋送祭文香帛令督撫布政使大員致祭又加

四海龍神封號東海曰顯仁南海曰昭明西海曰正恒北海曰崇禮均遣官齋送祭文香帛令地方官致祭又加

大沽海口神廣惠封號加

洞庭湖神涵元匯利封號均致祭如儀又封雲南各鹽井神為普潤龍王之神令地方官立廟春秋致祭

三年三月封山東臨清州

河神為福漕漳河之神館陶縣

河神為惠濟漳河之神又封

青海水神為靈顯青海之神先是大軍西征道經青海於塞外嚴寒之候湧泉濟軍督臣奏請封號從之並令委官致祭又河南撫臣奏言百泉之上

衛源神祠通漕濟運請列祀典從之五年二月以黃河澄清遣官分往江南清河河南武陟兩縣致祭

河神廟五月重修江南宿遷縣阜河

河神廟春秋致祭十二月遣官致祭

河源之神於河州口外六年封河東

鹽池神為昭惠阜裕鹽池之神七年建

江神廟於湖北武昌府春秋致祭又封浙江蛟門山

龍神為涵元昭泰鎮海龍神又封寧夏大渠

龍神為寧渠普利龍王之神八月建

海神廟於浙江海寧縣今升為州先是奉

諭旨朕惟古聖人之制祭禮也凡山川嶽瀆之神有功德於民生能為之禦災捍患者皆載在祀典蓋所以薦歆昭格崇德報功也雍正二年浙江海塘潮水沖決發帑修築比年以來塘工完整災沴不作居民安業今年潮汎盛長幾至泛濫官民震恐幸而水勢漸退隄防無恙此皆神明默垂護祐惠我蒸民者也茲特發內帑十萬於海寧縣敕建海神之廟以崇報享著該督遴委賢員度地鳩工務期制度恢宏規模壯麗崇奉祀事用答明

神庇民禦患之休烈尋建廟工成

御製碑文

敕加寧民顯佑浙海之神封號遣官致祭是年又建

湘江神廟於湖南長沙府春秋致祭又建

河源神廟於甘肅河州加封為開津廣濟佑國庇民昭
應河源之神先是奉

諭旨古稱黃河之神上通雲漢光啟圖書禮曰三王之祭
川也皆先河而後海此之謂務本惟神澤潤萬國福庇

兆民自古及今功用昭著我朝自定鼎以來仰荷神庥
尤為彰顯至於澄清於六省之遙閱歷於七旬之久稽
諸史冊更屬罕聞朕思江南河南等處皆有廟宇而河
源相近之處向來未建專祠考河源發於崑崙地隔遙
邊人稀境僻其流入內地之始則在秦省之西寧地方
朕意欲於此地特建廟宇專祀河源之神九卿詳議具
奏尋議於河州口外擇地建廟春秋致祭

御製碑文勒石從之又封直隸

濬沱河神為長源永濟濬沱河神春秋致祭九年建
永定河神惠濟廟於石景山遣大臣致祭十年閏五

月建望祭

長白山享殿於溫德亨山

今名望祭山

七月建

洪澤湖神廟於高家堰春秋致祭是年又封廣西興

安縣陡河

海陽山神為安流襄績海陽山神十一年封廣西鬱

林州

泉神為昭德沛澤泉源之神十三年九月

皇上登極遣官致祭

嶽鎮海瀆

長白山十一月以恭工

世宗憲皇帝尊諡遣官致祭山川如禮

乾隆元年八月奉

諭旨南北河工與浙江海塘關繫國計民生最為緊要
當朕即位元年咸慶安瀾理宜虔修祀典以答神貺

部臣議於清河武陟海寧三處

神祠照例齋送祭文香帛令總督致祭又令直隸總督往石景山致祭

永定河神從之二年四月以恭奉

世宗憲皇帝配享

南郊遣官致祭

嶽鎮海瀆

長白山十二月以

冊立

皇后恭上

皇太后徽號遣官致祭山川如禮三年立

海神廟於江南寶山縣春秋致祭八年八月

皇上東巡

盛京遣官致祭

北鎮暨巫閭山

長白山十二年六月

諭內閣奉

聖母皇太后懿旨泰山靈嶽坤德滋生近在魯邦宜崇報享朕不敢違爰遵

慈訓親奉

鑾輿秩於岱宗旋蹕青齊觀風布澤以昭崇

聖法

祖教孝省方鉅典大學士等會議以聞尋議奏古者因名山以升中原有燔柴之禮

聖祖仁皇帝因儀文度數書闕有間議封禪者尤多不經
特允廷議以祀五嶽禮致祭令

皇上東巡致祭泰山應遵康熙二十三年之例舉行惟
是致祭方嶽向未用樂謹案周禮大司樂奏蕤賓
歌函鍾舞大夏以祭山川是山川之祭自古用樂
今

特舉盛典秩於岱宗請用中和韶樂令儒臣增撰樂章
太常協律郎率樂生豫習備用從之十三年二月

諭稽古巡狩翕河喬嶽典禮攸隆朕茲親祀

孔廟有事於

泰山其嶽瀆等祀皆宜薦馨用申誠敬著各該督撫就近遴委大員致祭

東巡至泰安日

親詣

嶽廟於配天門降輿由仁安門入三上香行一跪三拜禮翼日致祭如儀十四年四月以平定金川恭上

皇太后徽號遣官致祭山川如二年之禮十五年九月以

冊立

皇后恭上

皇太后徽號遣官致祭山川如十四年之禮十月

皇上巡幸中州

親詣

嵩嶽廟上香翼日致祭均與十三年祭

岱宗禮同並以

御道所經遣官致祭

河瀆及

衛源神祠十六年二月

皇上南巡江浙凡

鑾輿所經於山東遣官致祭

泰嶽又

親詣

岱廟行禮於江南則

河瀆

淮瀆

江瀆之神皆遣官致祭並

親祭清河

河神廟至浙遣官祭

海神廟及

南鎮會稽山如禮又凡往返渡河渡江致祭之處皆

親詣上香行禮嗣是

南巡所過名山大川均致祭如禮

二十二年二十七年三十年四十五年四

十九年六次
南巡並同

是年六月封

永定河神為安流廣惠之神廟名惠濟即將盧溝橋
石景山二處舊廟酌加修葺工竣遣官告祭並飭
有司春秋展祀十二月以

皇太后六旬萬壽恭上

徽號遣官致祭山川如十五年之禮十九年八月

皇上東巡

盛京望祭

長白山渡松花江祭

江神九月祭

北鎮暨巫閭山嗣是

東巡

盛京均致祭如禮

四十四年四十八年
四巡盛京並同

又吉林東

門外有望祭

北海之處遣官致祀如儀二十年六月以平定伊犁恭

上

皇太后徽號遣官致祭山川如十四年之禮是歲以遣大
兵西征所過之山一曰阿勒台山一曰珠爾庫柱
山一曰博克達山一曰阿拉克山皆以

詔旨讀文致祭二十二年三月

皇上南巡駐蹕杭州奉

諭旨浙海之神自雍正八年海塘告成時

特加褒封

敕於海寧縣地方建廟崇祀邇年以來海波不揚塘工輦
固朕省方浙中親臨踏閱見大溜直趨中小鹽兩岸
沙灘自為捍禦濱海諸邑得慶安瀾利及生民實資
神明顯佑應於杭州省城之觀潮樓敬建海神之廟
以昭朕崇德答佑至意應行事宜該部查例具奏禮
部奏言悉遵雍正八年

敕建海寧海神廟事宜舉行從之乃建廟於觀潮樓

敕封為平潮利涉浙海之神嗣是

南巡皆

親詣行禮

二十七年三十年四十五年四十九年
南巡至海寧並

親詣

海神廟行禮

四月

皇上親臨徐州閱視河工以河溜刷深神明默佑令地

方官建

河神廟於雲龍山之北加封為顯佑通濟昭靈効順

廣利安民金龍四大王之神二十四年十一月以

蕩平回部遣官致祭山川如二十年之禮二十五

年定西域山川祀典每歲春秋令駐劄大臣致祭
其祭文香帛由京師齋往二十六年十二月以

皇太后七旬萬壽恭上

徽號致祭山川如十六年之禮三十二年三月

諭東西二淀為畿輔匯萃清流之所邇年瀦蓄安恬節
宣有藉近淀村莊田土泛濫無虞而菰蒲魚鱉之饒
利賴於民生者更大茲者春巡郊甸循覽河堤鳳艇
乘流祥飈助順尤足徵神貺之昭宜建專祠用答靈

佑著該督方觀承卜地興工特崇廟祀以示妥神報功之典三十五年八月

皇上六旬萬壽遣官致祭山川如禮三十六年二月以新葺

泰山祠廟歲工恭逢

皇太后八旬大慶

皇上祇奉

安輿瞻禮

岱廟並

親詣

嶽頂行上香禮十二月以恭上

徽號遣官致祭山川如二十六年之禮三十九年四月封

陝西

太白山神為昭靈普潤太白山之神建祠祀之四十

一年二月以平定兩金川集勲奏凱

皇上親奉

皇太后東巡展禮

泰岱四月以恭上

徽號遣官致祭山川如三十六年之禮四十二年二月陶
莊開放引河工成

命建

河神廟歲以春秋致祭

御製碑文紀之八月定兩金川山川祀典每歲春秋致
祭十月陝西撫臣奏請修葺

華嶽廟從之四十三年八月

諭海為衆水朝宗最昭靈應乃各處

海神咸有廟祀惟

北海自山海關至盛京一帶向未專建廟宇以隆裡祀
尚屬闕典朕此次詣盛京恭謁

祖陵蹕途循海而行瞻望甚近宜先申虔祭以迓靈庥著
該部於濱海地方擇地望祭派莊親王永璫行禮所
有應行事宜各衙門即速照例備辦並著周元理於

山海關澄海樓相近處所度地建立

北海神廟即行繪圖呈覽候朕降旨發帑興工俾廟貌
崇閎以妥

神佑又

諭遼河雙源遙引合而為巨流河襟帶神臯恬波涵潤
實為陪都境內大川朕恭謁

祖陵蹕路所經舟梁利涉緬念

河神之功甚溥顧該處向無祠祀典尚闕焉著邁拉

遜德成會同將軍府尹於勘估城工之便在瀕河高
阜處所度地計工奏聞請帑專建

河神廟以昭妥侑九月

諭渾河發源遙遠自東北來入英義邊門西流幾及千
里會遼入海縈護

三陵滋演萬年

靈脈長川襟帶並衛陪都厥功甚鉅自宜虔崇廟祀以答
神庥著交邁拉遜德成會同將軍府尹於盛京城東

度地鳩工奏聞請帑興建

河神廟以昭妥侑又

諭前已降旨於山海關之澄海樓旁建立

北海神廟茲稽考祀典北海原於河南濟源縣望祭河
南地屬中州且非濱海固於事理未協嗣經改於吉
林東門外望祭雖屬北境然距海尚遠亦非所宜所
有春秋秩祀及遇告祭典禮自應恭移於此以協方
位至吉林之松花江導源長白襟帶神臯為本朝

發祥之地綿演億萬載

景祚靈長厥功甚鉅自宜虔崇廟祀用迓神庥已諭令吉林將軍福康安於吉林城外濱江處所度地鳩工興建

松花江神廟其一切祀事即照從前望祭

北海之制著禮部載入會典遵行四十五年二月

皇上南巡渡河日

親詣陶莊

河神廟瞻禮

臣等謹案四十二年陶莊開放引河工成
敕建廟宇以答

神貺至是年二月初十日

親臨瞻禮以儀封漫工未成

默致虔禱適引河放溜奏至

御製詩以誌事十一日儀封兩壩自行合龍即告工成

詳見

御製河復記仰惟

聖神感召之速不應僕志誠為史冊所罕聞

四十五年八月

皇上七旬萬壽遣官致祭山川如三十五年之禮四十

七年二月

命侍衛阿彌達馳往西寧務窮河源致祭

河神三月

諭朕前歲南巡駐蹕金山即敬書金山靈區安瀾恒佑

宏仁廣濟至德尊神牌位供奉神祠及回鑿渡江時
雖有風濤而御舟穩渡實賴神佑不可不崇昭秩祀
以答靈庥著該部載入祀典嗣後每遇致祭之期著
該部封香帛祝文送往交該督撫親詣金山寺行禮
四十八年三月河南撫臣秦言重修

中嶽廟告成請

賜碑記

御製詩一章疊庚午禋祀詩韻

命勒石四十九年十一月河南蘭陽睢寧新堤并引河

工成

命建

河神廟於南岸

御製碑文記之五十年正月以

御極五十年嘉慶疊臻遣官致祭山川如四十五年之

禮

是年遣祀於山海關致祭

北海改定為制

凡致祭山川儀節具

大清通禮

耤田

順治十年三月

詔舉行

先農祀典十一年二月

世祖章皇帝行耕耤禮

親祭

先農壇壇在正陽門外

太歲壇西南壇北為正殿東南為

觀耕臺臺前為耜田東北為

神倉前為收穀亭定制歲以清明節後亥日祭

先農壇禮成即行

耕耜禮及秋玉粒告成所司以

聞擇吉收貯

神倉以供

天

地

宗廟

社稷之粢盛

康熙十一年二月

聖祖仁皇帝行耕耤禮

親祭

先農壇前期遣官祇告

奉先殿

雍正二年二月

世宗憲皇帝行耕耤禮

親祭

先農壇

躬耕三推畢復加一推

頒發新製三十六畝詞使工歌左右隨行禮畢王以下行

慶賀禮停止筵宴自是每歲皆

親耕如儀是年耤田內產瑞穀一莖四穗者三本一莖三

穗者三本一莖兩穗者十二本順天府尹張令璜

奏進羣臣請宣付史館從之次年所產尤多有至
一莖九穗者

豐澤園所植稻亦然並以羣臣表賀宣付史館四年

八月

諭國以民為本民以食為天朕念切民依舉行耕藉之禮
殫竭精誠為民祈穀於

上帝乃雍正二年三年藉田特產嘉禾今歲所產自一莖
雙穗至九穗皆碩大堅好異於常穀朕見之心甚慰悅

特令宣示廷臣蓋實有見於天人感召之理捷於影響
無纖毫之或爽朕以至誠肫懇之心每歲躬耕藉田以
重農事即蒙

上帝降鑒疊產嘉穀以昭休應豈人力之所強為乎禮曰
天子為耜千畝諸侯百畝則耕藉之禮亦可通於臣下
矣朕意欲地方守土之官俱行耕藉之禮使之知稼穡
之艱難悉農民之作苦量天時之晴雨察地力之肥磽
凡為官者存重農課稼之心凡為農者無苟安怠惰之

習於養民務本之道大有裨益九卿詳議具奏尋奏上
請令奉天府尹各直省督撫及府州縣衛官於所
治地方擇潔淨之地設立

先農壇及耤田自雍正五年為始每歲仲春亥日各率
所屬行禮如儀所收米粟敬謹收貯以供祭祀之
案盛其祭

先農壇之禮如祭

社稷凡大小武職官與文職官一體與祭俾知耕耤鉅

典從之又以吉林黑龍江二處將軍皆有民社之
任令照直省之例建立

先農壇致祭耕耤以重農事

乾隆三年三月

皇上行耕耤禮前期六日

幸豐澤園演耕至日

親祭

先農壇遂詣耤田行三推禮畢復加一推禮成

上御齋官王以下行慶賀禮五年三月禮部奏

親耕典禮原可間歲舉行今逢閏歲春寒更衣行禮不
無過於煩勞請暫行停止其致祭

先農壇遣官行禮從之八年二月

諭向來

先農壇親祭始用中和韶樂遣官則同小祀之例不用
中和韶樂按

日

月壇中祀雖遣官仍用中和韶樂惟不飲福受胙朕思
國家之大事在農

先農壇宜在中祀之列此次遣親王恭代即著照

日

月壇之例用中和韶樂永著為令十三年三月

皇上東巡是年致祭

先農壇遣官恭代順天府府尹率屬行耕耤禮自後恭

遇

時巡省方遣官恭代順天府府尹率屬行耕藉如禮十

九年三月重修

先農壇先是奉

諭朕每歲親耕藉田而

先農壇年久未加崇飾不足稱朕祇肅明禋之意今

兩郊大工告竣應將

先農壇宇修繕鼎新其外墻隙地老圃於彼灌園殊為
褻瀆應多植松柏榆槐俾成陰鬱翠庶足以昭虔妥

靈該部會同查明具奏總理工程王大臣等遵

旨詳議次第修繕疏上從之二十三年二月

諭吉亥耜畝所重劬農黛耜青箱畚鍤蓑笠咸寓知民
疾苦之意而設棚懸線以庇風雨義無取焉吾民涼
雨犁而赤日耘雖襁褓之尚艱豈炎濕之能避且片
時用而過期撤是中人數十家之產也其飭除之三

十七年三月

皇上行耕耜禮臣工以

聖壽六旬以上請遣官恭代不許嗣是

親耕皆依古制三推弗行加一之禮又是年大學士等

遵

旨議准郊

天儀注並酌定

躬詣

先農壇行禮儀節

皇上御禮轎自外北天門入內北天門循

太歲殿後轉至

先農壇東北隅降輿詣

壇行禮禮成仍於降輿處

御禮轎詣

太歲殿上香

臣等謹案是年大學士等遵

旨議准郊

天儀注並酌定

先農壇行禮儀節三十九年奉

諭年逾六旬始如此酌量節減謹詳載

南郊篇云

四十七年三月

皇上親祭

先農壇行耕耤禮五十年三月

皇上親祭

先農壇行耕耤禮十月

諭每歲春三月應祭

先農壇行耕耤禮禮部俱先期將祭祀日期及一應事宜預行具題雖屬照例辦理但國家典禮以實不以文朕臨御以來兢兢以敬

天勤民為念

郊

壇大祀無不躬親即耤田親耕亦從未嘗稍憚煩勞雖本年壽已七十有五猶親舉三推之典惟是春秋已高

或恐步履稍遜若二三年後自揣精力如常偶一舉
行豈非熙朝盛事至本年甫經親行耕藉明歲應否
躬蒞自應候朕酌行乃禮部仍照例具題竟似每歲
俱應親詣行禮者然豈不轉為具文耶我國家受

命延洪純嘏敷錫世世子孫若能皆似朕之敬勤不倦自

必景祚綿長享國久遠朕所用古稀天子之寶特於
乾清宮存貯一分若我子孫內有享永祚而登上壽
者亦得鈐用此寶洵為社稷靈長之福嗣後我子孫

繼承奕禩惟當不懈益勤凡遇親耕典禮若年在六十以內禮部自應照例具題年年躬行耕藉若年逾六十令禮部先期以親莅或遣官之處具本題請庶鉅典不尚虛文而展禮益昭誠敬著為令凡耕藉祭先農儀具

大清通禮

先蠶

乾隆元年建

先蠶祠於安定門外北郊每歲季春巳日遣太常寺卿
一人以少牢致祭七年七月大學士鄂爾泰等奏
言古制天子親耕南郊以共粢盛后親蠶北郊以
共祭服我

皇上親耕藉田以示重農至意乾隆元年議建先蠶祠
宇所以經理農桑之道至為周備今又

命議親蠶典禮伏思躬桑親蠶歷代遵行但蠶壇向在
安定門外前明以來遺址久經罷廢考唐宋時后

妃親蠶多在宮苑之中伏讀

聖祖仁皇帝御製耕織圖序於豐澤園之北治田數畦環以溪水隴畔樹桑旁立蠶舍是育蠶之事

聖祖仁皇帝親加講求今逢重熙累洽禮明樂備之時親蠶大典關係農桑自應遵

旨舉行以光典禮請交內務府禮部詳議奏上從之乃建

先蠶壇於

西苑之東北壇東南為

先蠶神殿西向壇東為

觀桑臺前為桑園浴蠶河在宮牆之東自北垣流入

由南垣出設閘啟閉木橋二蠶署蠶室均在橋之

東西向定制

皇后親蠶之年豫日設立

先蠶西陵氏神位於蠶壇之上前二日

皇后於正殿致齋至日以一太牢

親祀行三獻禮翼日

蠶未生則訊日

皇后詣桑壇行

躬桑禮蠶事畢蠶母率蠶婦擇繭之圓潔者貯筐恭獻

以告蠶事之登擇吉

皇后復詣蠶壇親臨織室行繅三盆手禮遂布於蠶婦之吉者使繅而朱綠元黃之以供

郊

廟黼黻之用

蠶母二人於內外命婦中擇高年嫺禮儀者充之蠶婦二十七人擇內苑熟悉蠶事者充

之九年三月

皇后親饗

先蠶壇翼日行

躬桑之禮十一年二月

諭從前建立蠶祠未議皇后親蠶之禮是以照祭祀例
遣官令既舉行皇后親蠶典禮若遇不行親祭之年
自應遣妃一人恭代所有行禮儀注大學士會議具
奏尋議上嗣後每年

皇后親蠶或遣

妃恭代禮部兩請具題如遇遣

妃恭代之年著內務府請

旨十四年二月

諭禮部奏稱本年三月內先蠶祭期請照例遣妃致祭
此於禮意未協夫妃所恭代者代皇后也有皇后則
妃可承命行事皇貴妃未經正位中宮則親蠶之禮
尚不當舉行何得遣妃恭代應照皇帝不親行耕耤

順天府尹致祭

先農之例於內務府總管或禮部太常寺堂官奉宸苑卿內酌派一人致祭方足以明等威而昭儀制是年

遣內務府堂官行禮十六年三月吉己宜饗

先蠶恭逢


皇上南巡禮部先期奏請照

皇后不行親祭之年遣

妃一人恭代奉

旨皇后行禮後再遣妃恭代是年仍遣內務府堂官行
禮儀具

大清通禮



皇朝通典卷四十四